

02/03/1998

Missaglia juara keseluruhan

KUALA LUMPUR, Ahad - Pelumba pasukan profesional bahagian satu Mapei-Bricobi, Gabriele Missaglia muncul juara keseluruhan Le Tour de Langkawi 1998 (LTDC) apabila mengumpul 45 jam 12.50 saat dalam 12 peringkat perlumbaan edisi ketiga yang berakhir di Dataran Merdeka, hari ini.

Missaglia yang merampas jersi kuning selaku pendahulu individu keseluruhan daripada rakan sepasukan Andrea Tafi di peringkat ke-11 Tanjung Malim ke Genting Highlands semalam, menamatkan perlumbaan peringkat ke-12 kriterium 12 pusingan semalam di tempat ke-28.

Catatan masa yang sama, 1 jam 24.36 saat dengan pemenang Luca Cei dari pasukan Scigno-Gaerne yang memenangi peringkat terakhir itu, tidak mengubah kedudukan Missaglia kekal selaku juara keseluruhan.

Dengan kelebihan 26 saat, Missaglia yang terkenal pantas ketika memecut dan mendaki gunung, hanya perlu mengekalkan kayuhan dalam kelompok besar di sepanjang 12 pusingan melalui Jalan Raja Laut-Jalan Parlimen-Jalan Damansara-Jalan Sultan Hishamuddin dan kembali ke Jalan Raja Laut sambil memastikan Cei tidak menamatkan perlumbaan jauh di depan.

Tempat kedua perlumbaan 12 pusingan sejauh 5.8km sepusingan semalam dimenangi pelumba MROZ, Piotr Wadecki manakala Graeme Miller dari New Zealand di tempat ketiga.

Sebelum ini, Missaglia yang hanya berperanan pembantu kepada pelumba handalan Mapei-Bricobi, Tafi dan Guiliano Figueras, berada di tangga kelima keseluruhan sebelum kayuhan baiknya di peringkat ke-11 di Genting Highlands semalam menyaksikan dia mengatasi Tafi yang memegang jersi kuning di 10 perlumbaan peringkat.

Pemegang jersi lain turut mengekalkan gelaran mereka apabila tiba bersama kelompok besar pelumba di garisan penamat, semalam. Mereka adalah pemegang jersi oren (pelumba terbaik Asia Timur) Tonton Susanto dari Indonesia; jersi merah (Raja Bukit) bagi pelumba Afrika Selatan, Douglas Ryder dan jersi hijau (Raja Pecut) kepada pelumba Saturn, Fred Rodriguez.

Kemenangan itu menyaksikan Missaglia bakal menerima RM80,000 di samping membantu Mapei-Bricobi memenangi RM30,000 lagi sebagai juara keseluruhan berpasukan.

Hadiah dan jersi disampaikan Perdana Menteri, Datuk Seri Dr Mahathir Mohamad, selaku penaung LTDL.

(END)